

Հաստատված է նոր խմբագրությամբ
«Հայաստանի ֆոնդային բորսա» ԲԲԸ
դիտորդ խորհրդի որոշմամբ

Նոր խմբագրությամբ գրանցված է

Հայաստանի Հանրապետության
կենտրոնական բանկում

Գլխավոր տնօրեն՝ Հայկ Եգանյան

Նախագահ՝ Արթուր Զավադյան

«17» հունվարի, 2019թ.
ք. Երևան
ՀՖԲ-01/071Լ

« __ » _____ 2019թ.

«ՀԱՅԱՍՏԱՆԻ ՖՈՆԴԱՅԻՆ ԲՈՐՍԱ» ԲԱՑ ԲԱԺՆԵՏԻՐԱԿԱՆ ԸՆԿԵՐՈՒԹՅՈՒՆ

ԱՌԵՎՏՐԻ ԸՆԴՀԱՆՈՒՐ ԿԱՆՈՆՆԵՐ

(ՆՈՐ ԽՄԲԱԳՐՈՒԹՅԱՄԲ)

Գլուխ 1. Հասկացություններ

- 1) Սույն կանոններում կիրառվող հասկացություններն ունեն սույն գլխով սահմանված նշանակությունները:
- 2) «**Առևտրի կանոններ**». Օպերատորի «Առևտրի ընդհանուր կանոններ»-ի, «Կորպորատիվ արժեթղթերի առևտրի կանոններ»-ի, «Պետական պարտատոմսերի առևտրի կանոններ»-ի, «Արտարժույթի առևտրի կանոններ»-ի և «Ժամկետային վարկային ռեսուրսների առևտրի կանոններ»-ի համախումբը:
- 3) «**Առևտրային համակարգ**». էլեկտրոնային եղանակով առևտրի կազմակերպման և դրա հետ կապված տեղեկատվության մշակման և պահպանման, ինչպես նաև Օպերատորի Առևտրի կանոններով սահմանված այլ գործառույթների իրականացման համար Օպերատորի կողմից օգտագործվող տեխնիկական, ծրագրային և այլ միջոցների համախումբը:
- 4) «**Առևտրային օր**». աշխատանքային օր, որի ընթացքում Օպերատորը կազմակերպում է ֆինանսական գործիքների առևտուր:
- 5) «**Առևտրային նստաշրջան**». առևտրային օրվա ժամանակահատված, որի ընթացքում Օպերատորի Առևտրի կանոններով սահմանված կարգով իրականացվում է ֆինանսական գործիքների առևտուրը:
- 6) «**Նախաառևտրային նստաշրջան**». առևտրային նստաշրջանին նախորդող ժամանակահատված, որի ընթացքում Օպերատորի Առևտրի կանոններով սահմանված կարգով կարող են ներկայացվել առուվաճառքի գնման (վաճառքի) հայտեր, սակայն համապատասխան հանդիպակաց հայտերի առկայության դեպքում գործարքներ չեն կնքվում:
- 7) «**Բացման աճուրդ**». առևտրային նստաշրջանի բացման պահը, որն անմիջապես հաջորդում է նախաառևտրային նստաշրջանին, երբ նախաառևտրային նստաշրջանի ընթացքում ներկայացված հայտերը Օպերատորի Առևտրի կանոններով սահմանված կարգով կարող են բավարարվել, իսկ չբավարարված հայտերն առևտրային համակարգից չեն հեռացվում և առևտրային նստաշրջանի բացման պահից ընդգրկվում են երկկողմանի անընդհատ աճուրդի եղանակով կազմակերպվող առևտրային նստաշրջանի համապատասխան Հերթերում:
- 8) «**Հետառևտրային նստաշրջան**». առևտրային նստաշրջանի ավարտին հաջորդող ժամանակահատված, որի ընթացքում Օպերատորի Առևտրի կանոններով սահմանված կարգով կարող են ներկայացվել հայտեր և կնքվել գործարքներ տվյալ նստաշրջանին նախորդող առևտրային նստաշրջանի ընթացքում ձևավորված միջին կշռված գնով:
- 9) «**Բորսայի անդամ**». Օպերատորի «Անդամակցության և շուկային մասնակցության կանոններին» համապատասխան Բորսայի անդամի կարգավիճակ ստացած Շուկայի մասնակից:
- 10) «**Շուկա**». օրենքով և Օպերատորի կանոններով սահմանված կարգով որևէ ֆինանսական գործիքի հրապարակային առևտուր կազմակերպելու նպատակով Օպերատորի կողմից կազմակերպված շուկա:
- 11) «**Շուկայի մասնակից**». ՀՀ Կենտրոնական բանկը, ինչպես նաև այն Բանկերը, Վարկային կազմակերպությունները, Ներդրումային ընկերությունները, Արժույթային դիլերները և Հայաստանի Հանրապետության օրենսդրությամբ և միջազգային պայմանագրերով Հայաստանի Հանրապետության տարածքում բանկային գործունեություն իրականացնելու և/կամ ներդրումային ծառայություններ մատուցելու իրավասություն ունեցող անձինք, որոնք Օպերատորի հետ ունեն առևտրին մասնակցության վերաբերյալ գործող պայմանագիր և

որոնց Օպերատորի կանոններին համապատասխան թույլատրվել է մասնակցելու որևէ շուկայում Օպերատորի կողմից կազմակերպվող առևտրին:

- 12) **«Բանկ»**. ՀՀ օրենսդրությամբ սահմանված բանկային գործունեության իրականացման լիցենզիա (իրավունք) ունեցող իրավաբանական անձ:
- 13) **«Վարկային կազմակերպություն»**. ՀՀ օրենսդրությամբ սահմանված վարկային կազմակերպության գործունեության իրականացման լիցենզիա ունեցող իրավաբանական անձ:
- 14) **«Ներդրումային ընկերություն»**. ՀՀ օրենսդրությամբ սահմանված ներդրումային ծառայությունների մատուցման լիցենզիա (իրավունք) կամ օտարերկրյա ներդրումային ընկերության մասնաճյուղի գրանցում ունեցող իրավաբանական անձ:
- 15) **«Առևտրի մասնակից»**. Շուկայի մասնակցի կողմից Շուկայում առևտրին մասնակցելու համար լիազորված ֆիզիկական անձ, որը Օպերատորի Առևտրի կանոններով սահմանված կարգով իրավունք ունի Շուկայի մասնակցի անունից մասնակցել առևտրին:
- 16) **«Հեռացված տերմինալ»**. Օպերատորի տարածքից դուրս գտնվող և Շուկայի մասնակցի կողմից առևտրին մասնակցելու նպատակով առանձնացված համակարգիչ, որին Օպերատորի կողմից տրված է առևտրային համակարգին միանալու անհատական թույլտվություն և որում տեղադրված է համապատասխան ծածկագրերով և գաղտնաբառերով ՍԻԲԻԷՆԵթ համակարգչային ցանցով կամ ինտերնետով առևտրային համակարգին իրական ժամանակի ռեժիմում միանալու հնարավորություն տվող ծրագրային մոդուլը:
- 17) **«Օպերատոր»**. «Հայաստանի ֆոնդային բորսա» բաց բաժնետիրական ընկերություն:
- 18) **«Դեպոզիտարիա»**. «Հայաստանի կենտրոնական դեպոզիտարիա» բաց բաժնետիրական ընկերություն:
- 19) **«Գործարքի կնքում»**. Օպերատորի Առևտրի կանոններով սահմանված կարգով գործարքի էական պայմանների և դրա արդյունքում ծագող իրավունքների ու պարտավորությունների վերաբերյալ առևտրի մասնակիցների միջև համաձայնության կայացում:
- 20) **«Գործարքի գին»**. գործարքի առարկա ֆինանսական գործիքի մեկ լոտի գին:
- 21) **«Գործարքի գումար»**. գործարքի արդյունքում ձեռք բերված ֆինանսական գործիքի դիմաց գնորդի կողմից վճարման ենթակա գումար (գործարքի գնի և գործարքի առարկա ֆինանսական գործիքի լոտերի քանակի արտադրյալը):
- 22) **«Դրամական միջոցներ»**. Օպերատորի կողմից կազմակերպվող առևտրի ընթացքում ֆինանսական գործիք ձեռք բերելու համար նախատեսված՝ Հայաստանի Հանրապետության դրամով կամ արտարժույթով արտահայտված դրամական միջոցներ:
- 23) **«Լավագույն գին»**. տվյալ ֆինանսական գործիքի գնման հայտերում նշված ամենաբարձր գինը կամ վաճառքի հայտերում նշված ամենացածր գինը:
- 24) **«Լավագույն հայտ»**. լավագույն գնով գնման (վաճառքի) հայտ:
- 25) **«Լիմիտային հայտ»**. անմիջապես ակտիվացմամբ գնման (վաճառքի) հայտ, որն առևտրային համակարգ մուտքագրվելու պահին կարող է մասնակիորեն կամ ամբողջությամբ բավարարվել հայտում նշված կամ դրանից ցածր (բարձր) գնով, իսկ առևտրային համակարգ մուտքագրվելուց և հայտերի հերթում ընդգրկվելուց հետո՝ միայն հայտում նշված գնով:
- 26) **«Շուկայական հայտ»**. անմիջապես ակտիվացմամբ գնման (վաճառքի) հայտ, որն առևտրային համակարգ մուտքագրվելուց անմիջապես հետո կարող է բավարարվել վաճառքի (գնման) լավագույն գնով, հակառակ դեպքում չի ընդգրկվում հայտերի հերթում:
- 27) **«Անմիջապես ակտիվացմամբ հայտ»**. հայտ, որն ակտիվացվում է անմիջապես՝ առևտրային համակարգ մուտքագրվելու պահին:

- 28) «**Այսբերգ հայտ**». լիմիտային հայտի տեսակ, որը նաև պարունակում է շուկայի մյուս մասնակիցներին չբացահայտվող՝ լոտերի պահուստային քանակություն: Առևտրային համակարգում տվյալ հայտով գործարք կնքվելու դեպքում հայտը, լոտերի պահուստային քանակության սահմաններում, ավտոմատ համալրվում է գործարքի առարկա լոտերի քանակի չափով, որի արդյունքում համապատասխան չափով նվազում է հայտում նշված լոտերի պահուստային քանակությունը: Ընդ որում՝ հայտում լոտերի պահուստային քանակության միջոցով հայտի ավտոմատ համալրման դեպքում տվյալ հայտը պահպանում է առևտրային համակարգում գրանցված իր ժամանակային առաջնահերթությունը:
- 29) «**Ստոպ հայտ**». անմիջապես չակտիվացվող գնման (վաճառքի) հայտ, որն առևտրային համակարգ մուտքագրվելուց հետո ակտիվանում և վերածվում է շուկայական հայտի այն պահին, երբ առևտրային համակարգում տվյալ ֆինանսական գործիքով կնքվում է հայտում նշված ստոպ գնից բարձր (ցածր) գնով գործարք, որի գինը տարբեր է նախորդ գործարքի գնից:
- 30) «**Ստոպ-լիմիտային հայտ**». անմիջապես չակտիվացվող գնման (վաճառքի) հայտ, որն առևտրային համակարգ մուտքագրվելուց հետո ակտիվանում և վերածվում է հայտում նշված լիմիտային գնով լիմիտային հայտի այն պահին, երբ առևտրային համակարգում տվյալ ֆինանսական գործիքով կնքվում է հայտում նշված ստոպ գնից բարձր (ցածր) գնով գործարք, որի գինը տարբեր է նախորդ գործարքի գնից:
- 31) «**Լրիվ բավարարմամբ հայտ**». հայտ, որն առևտրային համակարգ մուտքագրվելուց անմիջապես հետո կարող է բավարարվել բացառապես հայտում նշված լոտերի լրիվ քանակի չափով, հակառակ դեպքում չի ընդգրկվում հայտերի հերթում:
- 32) «**Մասնակի բավարարմամբ հայտ**». հայտ, որը կարող է բավարարվել ամբողջությամբ կամ մասնակիորեն:
- 33) «**Պահել օրվա ընթացքում**». հրապարակային գնանշման կամ մասնակի բավարարմամբ հայտի պայման, որի դեպքում տվյալ գնանշումը կամ տվյալ հայտի չբավարարված մասն ընդգրկվում է հայտերի հերթում մինչև տվյալ առևտրային նստաշրջանի ավարտը:
- 34) «**Հանել մնացորդը**». հայտի պայման, որի առկայության դեպքում հայտն ամբողջությամբ կամ մասնակիորեն կարող է բավարարվել միայն առևտրային համակարգ մուտքագրվելու պահին, իսկ հայտի չբավարարված մասը չի ընդգրկվում հայտերի հերթում:
- 35) «**Պահել մինչև չեղարկումը**». հրապարակային գնանշման պայման, որի դեպքում տվյալ գնանշումը մնում է առևտրային համակարգում մինչև առևտրի համապատասխան մասնակցի կողմից դրա չեղարկումը:
- 36) «**Լոտ**». ֆինանսական գործիքի նվազագույն քանակություն, որը թույլատրվում է նշել տվյալ ֆինանսական գործիքի գնման կամ վաճառքի հայտում: Յուրաքանչյուր շուկայում Լոտի չափը սահմանվում է տվյալ շուկայի առևտրի կանոններով:
- 37) «**Հայտ**». առևտրի մասնակցի կողմից առևտրային համակարգ մուտքագրված՝ որևէ ֆինանսական գործիքի գնման (վաճառքի) առաջարկ, որն ուղղված է տվյալ ֆինանսական գործիքով առևտրի իրավունք ունեցող շուկայի բոլոր մասնակիցներին և որտեղ նշված են այդ առաջարկի բավարարման բոլոր էական պայմանները:
- 38) «**Հասցեական առաջարկ**». առևտրային նստաշրջանի ընթացքում առևտրի մասնակցի կողմից առևտրային համակարգի միջոցով շուկայի որևէ մասնակցի ուղարկված՝ տվյալ ֆինանսական գործիքի առուվաճառքի կամ ռեպո գործարքի կնքման առաջարկ, որի ակցեպտավորման դեպքում առևտրային համակարգում գրանցվում է գործարքի կնքում:
- 39) «**Հրապարակային գնանշում**». առևտրի մասնակցի կողմից առևտրային համակարգ մուտքագրված և շուկայի մասնակիցներին ուղղված՝ ռեպո կամ սվոպ գործարքի կնքման հասցեական առաջարկ անելու հրավեր, որտեղ նշված են այդ առաջարկի հիմնական պայմանները:

- 40) «**Հայտի բավարարման էական պայմաններ**». առևտրի մասնակցի կողմից առևտրային համակարգ մուտքագրվող հայտում ներառվող պարտադիր պայմաններ, որոնց տվյալ հայտին հանդիպակաց որևէ հայտի բավարարման դեպքում առևտրային համակարգում գրանցվում է գործարքի կնքում:
- 41) «**Հերթ**». առևտրի մասնակիցների կողմից առևտրային համակարգ մուտքագրված և դեռևս չբավարարված՝ նույն ֆինանսական գործիքի գնման (վաճառքի) հայտերի կանոնակարգված հաջորդականություն:
- 42) «**Հանդիպակաց հայտեր**». գնման հայտերի համար՝ վաճառքի հայտերը և վաճառքի հայտերի համար՝ գնման հայտերը:
- 43) «**Համապատասխան հանդիպակաց հայտեր**». տվյալ հայտին հանդիպակաց այն հայտերը, որոնք համապատասխանում են տվյալ հայտի բավարարման էական պայմաններին և որոնց հիման վրա կնքվում է(են) գործարք(ներ):
- 44) «**Ռեպո գործարք**». առևտրի մասնակիցների միջև երկու փոխկապակցված՝ ռեպո-ուղղակի և ռեպո-հետադարձ գործարքների կնքման վերաբերյալ ձեռք բերված համաձայնություն, որոնցից առաջինով կողմերից մեկը վաճառում է տվյալ ֆինանսական գործիքը մյուսին, իսկ երկրորդով պարտավորվում է նրանից հետո գնել դրանք ապագայում՝ տվյալ պահին համաձայնեցված պայմաններով:
- 45) «**Սվոպ**». առևտրի մասնակիցների միջև երկու փոխկապակցված՝ սվոպ-ուղղակի և սվոպ-հետադարձ գործարքների կնքման վերաբերյալ ձեռք բերված համաձայնություն, որոնցից առաջինով կողմերից մեկը վաճառում է տվյալ արտարժույթը մյուսին, իսկ երկրորդով պարտավորվում է նրանից հետո գնել դրանք ապագայում՝ տվյալ պահին համաձայնեցված պայմաններով:
- 46) «**Ֆինանսական գործիք**». Օպերատորի կողմից առևտրին թույլատրված բաժնետոմս, պարտատոմս (այդ թվում նաև՝ արտարժույթով արտահայտված կորպորատիվ պարտատոմս), դեպոզիտար ստացական, ներդրումային ֆոնդի փայ, արտարժույթ կամ վարկային ռեսուրս:
- 47) «**Կորպորատիվ արժեթղթեր**». ցուցակված արժեթղթեր (բաժնետոմսեր և կորպորատիվ պարտատոմսեր), ինչպես նաև Օպերատորի ազատ շուկայի հարթակում առևտրին թույլատրված գործիքներ:
- 48) «**Պետական պարտատոմսեր**». Հայաստանի Հանրապետության անունից թողարկված պետական զանձապետական պարտատոմսեր և Հայաստանի Հանրապետության կենտրոնական բանկի կողմից թողարկված պարտատոմսեր:
- 49) «**Արտարժույթ**». «Արժույթային կարգավորման և արժույթային վերահսկողության մասին» ՀՀ օրենքի 3-րդ հոդվածի 3-րդ կետով սահմանված միջոցներ:
- 50) «**Վարկային ռեսուրս**». Հայաստանի Հանրապետության դրամով արտահայտված դրամական այն միջոցները, որոնք Շուկայի մի մասնակիցը որոշակի ժամկետով և տոկոսադրույքով Օպերատորի կանոններով սահմանված կարգով որպես փոխառություն նախատեսում է տրամադրել Շուկայի այլ մասնակցի:
- 51) «**Հարթակ**». Շուկայի հատված, որի համար Օպերատորի առևտրային համակարգում ստեղծված է համապատասխան միջավայր՝ շուկայի տվյալ հատվածում ֆինանսական գործիքներով կազմակերպվող առևտուրն առանձին չափանիշներին համապատասխան իրականացնելու նպատակով:
- 52) «**Հապավում**». Օպերատորի կողմից առևտրին թույլատրված ֆինանսական գործիքի նույն դասը կամ տեսակը բնութագրող տարբերակիչ կոդանիշ:
- 53) Օպերատորի Առևտրի կանոններում կիրառվող այլ հասկացություններն ունեն «Արժեթղթերի շուկայի մասին» ՀՀ օրենքով և Օպերատորի կանոններով սահմանված նշանակությունները:

Գլուխ 2. Շուկայի կառուցվածքը

- 54) Օպերատորը օրենքով և իր կանոններով սահմանված կարգով կազմակերպում է հետևյալ շուկաները՝
- ա) կորպորատիվ արժեթղթերի շուկա, որը ներառում է ֆոնդային բորսայի, ազատ շուկայի և կորպորատիվ արժեթղթերի տեղաբաշխման հարթակները.
 - բ) պետական պարտատոմսերի շուկա, որը ներառում է պետական պարտատոմսերի առևտրի և պետական պարտատոմսերի աճուրդների հարթակները.
 - գ) արտարժույթի շուկա.
 - դ) վարկային ռեսուրսների շուկա, որը ներառում է ժամկետային վարկային ռեսուրսների հարթակը:
- 55) Ֆոնդային բորսայի հարթակում շրջանառվում են Օպերատորի կանոններին համապատասխան ցուցակված բաժնետոմսերն ու ցուցակված կորպորատիվ պարտատոմսերը:
- 56) Ազատ շուկայի հարթակում շրջանառվում են այն բաժնետոմսերը, կորպորատիվ պարտատոմսերը, ներդրումային ֆոնդերի փայերն ու դեպոզիտար ստացականները, որոնք Օպերատորի կանոններին համապատասխան թույլատրվել են առևտրին առանց ցուցակվելու:
- 57) Կորպորատիվ արժեթղթերի տեղաբաշխման հարթակում Օպերատորն իր «Կորպորատիվ արժեթղթերի տեղաբաշխման կանոններին» համապատասխան կազմակերպում է կորպորատիվ արժեթղթերի տեղաբաշխումը, ինչպես նաև պետական մասնակցությամբ ընկերությունների՝ պետությանը պատկանող բաժնետոմսերի մասնավորեցումը: Պետական պարտատոմսերի տեղաբաշխման և/կամ հետզնման աճուրդները Օպերատորը կազմակերպում է պետական պարտատոմսերի աճուրդների հարթակում՝ իր «Պետական պարտատոմսերի աճուրդների կազմակերպման կանոններին» համապատասխան:
- 58) Օպերատորի կողմից կազմակերպվող շուկաներում և հարթակներում առևտուրը կազմակերպվում է լրիվ նախնական դեպոնացմամբ առևտրի եղանակով՝ սույն կանոնների 5-րդ գլխով սահմանված կարգով, բացառությամբ պետական պարտատոմսերի աճուրդների հարթակի, որտեղ պետական պարտատոմսերի տեղաբաշխման և/կամ հետզնման աճուրդներն Օպերատորը կազմակերպում է առանց նախնական դեպոնացման՝ իր «Պետական պարտատոմսերի աճուրդների կազմակերպման կանոններով» սահմանված կարգով:
- 59) Օպերատորի կողմից կազմակերպվող՝ ֆոնդային բորսայի, ազատ շուկայի և պետական պարտատոմսերի առևտրի հարթակներում համապատասխանաբար կորպորատիվ արժեթղթերով և պետական պարտատոմսերով կարող են կնքվել՝
- ա) առուվաճառքի գործարքներ՝ բացման աճուրդի, երկկողմանի անընդհատ աճուրդի և հասցեական առևտրի եղանակով՝ համապատասխանաբար սույն կանոնների 6-րդ, 7-րդ և 8-րդ գլուխներով սահմանված կարգով.
 - բ) ռեպո գործարքներ՝ սույն կանոնների 9-րդ գլխով սահմանված կարգով:
- 60) Օպերատորի արտարժույթի շուկայում արտարժույթով կարող են կնքվել՝
- ա) առուվաճառքի գործարքներ՝ երկկողմանի անընդհատ աճուրդի և հասցեական առևտրի եղանակով՝ համապատասխանաբար սույն կանոնների 7-րդ և 8-րդ գլուխներով սահմանված կարգով,
 - բ) սվոպ գործարքներ՝ սույն կանոնների 10-րդ գլխով սահմանված կարգով:
- 61) Օպերատորի վարկային ռեսուրսների շուկայում վարկային ռեսուրսներով կարող են կնքվել վարկային գործարքներ՝ առուվաճառքի գործարքների նմանությամբ և սույն կանոնների 7-րդ գլխով սահմանված կարգով:

- 62) Օպերատորի կողմից առևտուրը կազմակերպում է միայն ցուցակված կամ առևտրին թույլատրված ֆինանսական գործիքներով: Ֆինանսական գործիքներն առևտրին թույլատրվում են սույն կանոնների 63) և 64) կետերին համապատասխան:
- 63) Կորպորատիվ արժեթղթերը և պետական պարտատոմսերը առևտրին թույլատրվում են Օպերատորի «Արժեթղթերի ցուցակման և առևտրին թույլատրման կանոններով» սահմանված կարգով:
- 64) Արտարժույթը և վարկային ռեսուրսները առևտրին թույլատրվում են Օպերատորի գործադիր մարմնի ղեկավարի որոշմամբ:

Գլուխ 3. Առևտրային օրեր և առևտրային նստաշրջաններ

- 65) Ֆինանսական գործիքներով առևտուրն Օպերատորը կազմակերպում է իր էլեկտրոնային առևտրային համակարգի միջոցով:
- 66) Օպերատորի կողմից առևտուրը կազմակերպվում է հեռացված տերմինալներից ՍԻԲԷՆԵԹ համակարգչային ցանցով կամ ինտերնետով առևտրային համակարգին իրական ժամանակի ռեժիմում միանալու միջոցով:
- 67) Կորպորատիվ արժեթղթերի, պետական պարտատոմսերի, արտարժույթի և վարկային ռեսուրսների առևտրային օրեր են բոլոր աշխատանքային օրերը:
- 68) Նախաառևտրային նստաշրջաններն անցկացվում են առևտրային օրերին, ժամը 10:50-ից մինչև 10:59-ը ներառյալ, բացման աճուրդները՝ 11:00-ին:
- 69) Կորպորատիվ արժեթղթերի, պետական պարտատոմսերի և արտարժույթի առևտրային նստաշրջաններն անցկացվում են առևտրային օրերին, ժամը 11:00-ից մինչև 14:59-ը ներառյալ, իսկ հետաառևտրային նստաշրջանները՝ ժամը 15:00-ից մինչև 15:04-ը ներառյալ:
- 70) Ժամկետային վարկային ռեսուրսների առևտրային նստաշրջաններն անցկացվում են առևտրային օրերին, ժամը 11:00-ից մինչև 12:59-ը ներառյալ, իսկ հետաառևտրային նստաշրջանները՝ ժամը 13:00-ից մինչև 13:09-ը ներառյալ:
- 71) Առևտրային նստաշրջանի սկիզբն ու ավարտը (բացումն ու փակումը) ազդարարվում է առևտրային համակարգի միջոցով առևտրի մասնակիցներին ուղարկվող համապատասխան հաղորդագրությամբ:

Գլուխ 4. Առևտրի մասնակիցները

- 72) Օպերատորի կողմից որևէ շուկայում կազմակերպվող առևտրին ուղղակիորեն կարող են մասնակցել միայն տվյալ շուկայի մասնակիցները:
- 73) Կորպորատիվ արժեթղթերի առևտրին ուղղակիորեն կարող են մասնակցել միայն Բորսայի անդամները, որոնք համարվում են կորպորատիվ արժեթղթերի շուկայի մասնակից:
- 74) Վարկային ռեսուրսների առևտրին ուղղակիորեն կարող են մասնակցել միայն բանկերը:
- 75) Շուկայի մասնակցին շնորհվում է առևտրային կոդ:
- 76) Շուկայի մասնակիցը կարող է ունենալ առևտրի մի քանի մասնակից, որոնք միաժամանակ կարող են մասնակցել առևտրին:
- 77) Առևտրի մասնակիցները պետք է տիրապետեն առևտրային համակարգի ֆունկցիոնալ հնարավորություններին, որը ստուգվում է Օպերատորի կողմից՝ նախքան առևտրին մասնակցելու թույլտվության տրամադրումը: Կորպորատիվ արժեթղթերի և պետական պարտատոմսերի շուկայի մասնակիցների անունից հանդես եկող և ներդրումային ծառայություններ մատուցող առևտրի մասնակիցները պետք է ունենան նաև համապատասխան մասնագիտական որակավորում:

- 78) Առևտրի յուրաքանչյուր մասնակցի տրվում է ծածկագիր և գաղտնաբառ, որոնցով առևտրի տվյալ մասնակիցը կարող է գրանցվել առևտրային համակարգում և ստանալ առևտրին մասնակցելու թույլտվություն:
- 79) Առևտրի մասնակցին տրված ծածկագիրը և գաղտնաբառը համարվում են գաղտնի տեղեկություններ, որոնց կարող է տիրապետել միայն առևտրի տվյալ մասնակիցը: Առևտրի մասնակցին արգելվում է իրեն տրված ծածկագիրը և գաղտնաբառը երրորդ անձի, այդ թվում նաև՝ Շուկայի տվյալ մասնակցի անունից հանդես եկող առևտրի մեկ այլ մասնակցի հայտնել կամ դրանց ուղղակիորեն կամ անուղղակիորեն տեղեկանալու հնարավորություն ընձեռել:
- 80) Առևտրի մասնակիցների գրանցումն առևտրային համակարգում սկսվում է նախաառևտրային (առևտրային) նստաշրջանի սկսվելու պահից 10 րոպե առաջ և ավարտվում է առևտրային (հետառևտրային) նստաշրջանի ավարտի պահին:
- 81) Առևտրի մասնակիցներն առևտրային համակարգ ֆինանսական գործիքներով գնման (վաճառքի) հայտեր կարող են մուտքագրել նախաառևտրային (առևտրային) նստաշրջանի սկսման պահից: Հասցեական առաջարկների ներկայացում, ինչպես նաև ներկայացված հայտերի և հասցեական առաջարկների հիման վրա գործարքների կնքում թույլատրվում է միայն առևտրային նստաշրջանի բացման պահից սկսած: Հայտերն ու հասցեական առաջարկներն առևտրային համակարգ մուտքագրվում են միայն Շուկայի մասնակցի անունից և կարող են լինել սեփական կամ հաճախորդների հաշվին:

Գլուխ 5. Լրիվ նախնական դեպոնացմամբ առևտուր

- 82) Լրիվ նախնական դեպոնացմամբ առևտուրն իրականացվում է սույն գլխի պահանջների պահպանմամբ:
- 83) Լրիվ նախնական դեպոնացմամբ իրականացվող առևտրի ընթացքում առևտրի մասնակիցները գործարքներ կարող են կնքել նախապես դեպոնացված ֆինանսական գործիքների և դրամական միջոցների դրական մնացորդների սահմաններում, որոնք առևտրային (հետառևտրային) նստաշրջանի ընթացքում կարող են փոփոխվել սույն կանոնների 85) – 88) կետերում նշված դեպքերում և կարգով:
- 84) Մինչև առևտրային նստաշրջանի սկսվելը և նստաշրջանի ընթացքում դեպոնացված ֆինանսական գործիքների և դրամական միջոցների սկզբնական մնացորդների մասին տվյալներն ստացվում և առևտրային համակարգ են մուտքագրվում՝
- ա) կորպորատիվ արժեթղթերի և ժամկետային վարկային ռեսուրսների մասով՝ Օպերատորի և Դեպոզիտարիայի համապատասխան կանոններով և կանոնակարգով սահմանված ընթացակարգերով.
 - բ) արտարժույթի և պետական պարտատոմսերի մասով՝ Օպերատորի համապատասխան կանոններով սահմանված ընթացակարգերով:
- 85) Շուկայի մասնակիցների կողմից Օպերատորի և Դեպոզիտարիայի կանոններին համապատասխան կատարված լրացուցիչ դեպոնացումների դեպքում համապատասխան չափով ավելացվում են դեպոնացված միջոցների մնացորդները:
- 86) Առևտրի մասնակիցը Օպերատորի կանոններով նախատեսված դեպքերում և կարգով կարող է իր տերմինալից (հեռացված տերմինալից) ամբողջությամբ կամ մասնակի ապադեպոնացնել Շուկայի տվյալ մասնակցի դեպոնացված միջոցները՝ առևտրային համակարգում տվյալ պահին առկա և ազատ (չարգելադրված) մնացորդը կամ դրա մի մասը, որի դեպքում ապադեպոնացված միջոցների չափով նվազեցվում է դեպոնացված տվյալ միջոցի մնացորդը:

- 87) Առևտրի մասնակցի կողմից առևտրային համակարգ գնման հայտի (գնման հասցեական առաջարկի) մուտքագրման դեպքում տվյալ հայտում նշված՝ գործարքի գնի և լոտերի քանակի, այդ թվում՝ լոտերի պահուստային քանակի արտադրյալի չափով առևտրային համակարգում արգելադրվում է Շուկայի տվյալ մասնակցի կողմից որպես վճարման միջոց դեպոնացված՝ համապատասխան արժույթով (արտարժույթով արտահայտված արժեթղթերի դեպքում՝ տվյալ արտարժույթով) դրամական միջոցների մնացորդը, իսկ գործարքի կնքման դեպքում գնված ֆինանսական գործիքի լոտերի քանակի չափով ավելացվում է գործարքի արդյունքում գնված՝ տվյալ ֆինանսական գործիքի մնացորդը և գործարքի գումարի չափով նվազեցվում է որպես վճարման միջոց դեպոնացված՝ համապատասխան արժույթով դրամական միջոցների մնացորդը:
- 88) Առևտրի մասնակցի կողմից առևտրային համակարգ վաճառքի հայտի (վաճառքի հասցեական առաջարկի) մուտքագրման դեպքում տվյալ հայտում նշված ֆինանսական գործիքի լոտերի քանակի, այդ թվում՝ լոտերի պահուստային քանակի չափով առևտրային համակարգում արգելադրվում է Շուկայի տվյալ մասնակցի կողմից դեպոնացված՝ տվյալ ֆինանսական գործիքի մնացորդը, իսկ գործարքի կնքման դեպքում վաճառված ֆինանսական գործիքի լոտերի քանակի չափով նվազեցվում է գործարքի արդյունքում վաճառված՝ տվյալ ֆինանսական գործիքի մնացորդը և գործարքի գումարի չափով ավելացվում է որպես վճարման միջոց դեպոնացված՝ համապատասխան արժույթով դրամական միջոցների մնացորդը:
- 89) Առևտրի մասնակիցները առևտրային համակարգ որևէ ֆինանսական գործիքի վաճառքի հայտեր (վաճառքի հասցեական առաջարկներ) կարող են մուտքագրել տվյալ ֆինանսական գործիքի, իսկ գնման հայտեր (գնման հասցեական առաջարկներ)՝ որպես վճարման միջոց դեպոնացված՝ համապատասխան արժույթով դրամական միջոցների՝ տվյալ պահին առկա և ազատ (չարգելադրված) մնացորդների սահմաններում:
- 90) Սույն կանոնների 87) – 89) կետերի պահանջները տարածվում են նաև ռեպո և սվոպ գործարքների հասցեական առաջարկների վրա, ընդ որում՝
- ա) ռեպո/սվոպ-ուղղակի գործարքի դեպքում դրամական միջոցներով փոխառության տրամադրումը և ֆինանսական գործիքով փոխառության ստացումը, իսկ ռեպո/սվոպ-հետադարձ գործարքի դեպքում ֆինանսական գործիքի հետ ընդունումը և դրամական միջոցների վերադարձը համարժեք են գնման հասցեական առաջարկին.
 - բ) ռեպո/սվոպ-ուղղակի գործարքի դեպքում դրամական միջոցներով փոխառության ստացումը և ֆինանսական գործիքով փոխառության տրամադրումը, իսկ ռեպո/սվոպ-հետադարձ գործարքի դեպքում ֆինանսական գործիքի վերադարձը և դրամական միջոցների հետ ընդունումը համարժեք են վաճառքի հասցեական առաջարկին:

Գլուխ 6. Նախաառևտրային նստաշրջան և բացման աճուրդ

- 91) Նախաառևտրային նստաշրջանի ընթացքում ներկայացվող բոլոր հայտերը լիմիտային հայտեր են, որոնցում նշվում են դրանց բավարարման հետևյալ էական պայմանները՝
- ա) ֆինանսական գործիքի հապավումը.
 - բ) հայտի տեսակը՝ գնման կամ վաճառքի.
 - գ) մեկ լոտի գինը՝ համապատասխան արժույթով (արտարժույթով արտահայտված արժեթղթերի դեպքում՝ տվյալ արտարժույթով).
 - դ) լոտերի քանակը, իսկ այսբերգ հայտի դեպքում՝ նաև լոտերի պահուստային քանակը.
 - ե) հայտի բավարարման քանակական պայմանը՝ լրիվ կամ մասնակի բավարարմամբ.
 - զ) հայտի բավարարման ժամանակային պայմանը՝ պահել օրվա ընթացքում կամ հանել մնացորդը.

- ե) հայտի ակտիվացման պայմանը՝ անմիջապես ակտիվացմամբ կամ ստոպ:
- 92) Նախաառևտրային նստաշրջանի ընթացքում առևտրի մասնակիցների կողմից առևտրային համակարգ մուտքագրված՝ տվյալ ֆինանսական գործիքի գնման և վաճառքի հայտերն ընդգրկվում են երկու առանձին Հերթերում՝ ըստ գնային առաջնահերթության: Գնման հայտերը համապատասխան Հերթում դասակարգվում են ըստ գների նվազման, իսկ վաճառքի հայտերը՝ ըստ գների աճման: Նույն Հերթում մեկից ավելի հայտերում նշված գների հավասարության դեպքում այդ հայտերը Հերթում դասակարգվում են ըստ առևտրային համակարգում դրանց գրանցման ժամանակային առաջնահերթության:
- 93) Նախաառևտրային նստաշրջանի ընթացքում առևտրի մասնակիցներն իրավունք ունեն հանել Հերթում գտնվող՝ իրենց կողմից նախապես ներկայացված հայտերը, ինչպես նաև փոփոխել դրանցում նշված պայմանները (բացառությամբ ֆինանսական գործիքի հապավման և հայտի տեսակի):
- 94) Բացման աճուրդի եղանակով ֆինանսական գործիքներով առուվաճառքի գործարքների կնքումն իրականացվում է առևտրի մասնակիցների կողմից նախաառևտրային նստաշրջանի ժամանակ մուտքագրված՝ ֆինանսական գործիքների գնման (վաճառքի) հայտերի համեմատման և համապատասխան հանդիպակաց հայտերի առկայության դեպքում դրանց բավարարման եղանակով:
- 95) Բացման աճուրդի ժամանակ կնքվող յուրաքանչյուր գործարքի գինը հավասար է ըստ գնային առաջնահերթության պայմանի առաջնահերթ բավարարման ենթակա համապատասխան հանդիպակաց հայտերից այն հայտի գնին, որն առավել վաղ է մուտքագրվել առևտրային համակարգ:
- 96) Բացման աճուրդի ընթացքում չբավարարված հայտերն առևտրային համակարգից չեն հեռացվում և առևտրային նստաշրջանի բացման պահից ընդգրկվում են երկկողմանի անընդհատ աճուրդի եղանակով կազմակերպվող առևտրային նստաշրջանի համապատասխան Հերթերում:

Գլուխ 7. Երկկողմանի անընդհատ աճուրդ

- 97) Երկկողմանի անընդհատ աճուրդի եղանակով ֆինանսական գործիքներով առուվաճառքի գործարքների կնքումն իրականացվում է առևտրի մասնակիցների կողմից առևտրային համակարգ մուտքագրված՝ ֆինանսական գործիքների գնման (վաճառքի) հայտերի անընդհատ համեմատման և համապատասխան հանդիպակաց հայտերի առկայության դեպքում դրանց բավարարման եղանակով՝ սույն գլխով սահմանված կարգով:
- 98) Երկկողմանի անընդհատ աճուրդի ընթացքում ներկայացվող հայտում նշվում են դրա բավարարման հետևյալ էական պայմանները՝
- ա) ֆինանսական գործիքի հապավումը.
 - բ) հայտի տեսակը՝ գնման կամ վաճառքի.
 - գ) մեկ լոտի գինը (բացառությամբ շուկայական հայտի)՝ համապատասխան արժույթով (արտարժույթով արտահայտված արժեթղթերի դեպքում՝ տվյալ արտարժույթով).
 - դ) լոտերի քանակը, իսկ այսբերգ հայտի դեպքում՝ նաև լոտերի պահուստային քանակը.
 - ե) հայտի բավարարման գնային պայմանը՝ լիմիտային կամ շուկայական.
 - զ) հայտի բավարարման քանակական պայմանը՝ լրիվ կամ մասնակի բավարարմամբ.
 - է) հայտի բավարարման ժամանակային պայմանը՝ պահել օրվա ընթացքում կամ հանել մնացորդը.
 - ը) հայտի ակտիվացման պայմանը՝ անմիջապես ակտիվացմամբ կամ ստոպ:
- 99) Առևտրային նստաշրջանի ընթացքում առևտրի մասնակիցների կողմից առևտրային համակարգ մուտքագրված՝ տվյալ ֆինանսական գործիքի գնման և վաճառքի հայտերն

ընդգրկվում են երկու առանձին Հերթերում՝ ըստ գնային առաջնահերթության: Գնման հայտերը համապատասխան Հերթում դասակարգվում են ըստ գների նվազման, իսկ վաճառքի հայտերը՝ ըստ գների աճման: Նույն Հերթում մեկից ավելի հայտերում նշված գների հավասարության դեպքում այդ հայտերը Հերթում դասակարգվում են ըստ առևտրային համակարգում դրանց գրանցման ժամանակային առաջնահերթության:

- 100) Առևտրային նստաշրջանի ընթացքում առևտրի մասնակիցների կողմից առևտրային համակարգ մուտքագրվող ցանկացած հայտի պայմանները համեմատվում են հանդիպակաց հայտերի Հերթում առկա հայտերի պայմանների հետ: Հանդիպակաց հայտերի Հերթում համապատասխան հանդիպակաց հայտի (հայտերի) առկայության դեպքում առևտրային համակարգում գրանցվում է առուվաճառքի գործարքի (գործարքների) կնքում:
- 101) Եթե առևտրային նստաշրջանի ընթացքում մասնակի բավարարմամբ ներկայացված հայտը համապատասխան հանդիպակաց բոլոր հայտերով բավարարվելուց (գործարքների կնքումից) հետո այնուամենայնիվ բավարարվում է մասամբ, ապա մնացորդը (հայտի չբավարարված մասը) ընդգրկվում է Հերթում սույն կանոնների 99) կետում նշված կարգով կամ չի ընդգրկվում Հերթում՝ կախված հայտի բավարարման ժամանակային պայմանից:
- 102) Եթե առևտրային նստաշրջանի ընթացքում մասնակի բավարարմամբ ներկայացված հայտին Հերթում համապատասխան հանդիպակաց հայտեր չկան, ապա այն ընդգրկվում է Հերթում կանոնների 99) կետում նշված կարգով կամ չի ընդգրկվում Հերթում՝ կախված հայտի բավարարման ժամանակային պայմանից:
- 103) Առևտրի մասնակիցներն իրավունք ունեն հանել Հերթում գտնվող՝ իրենց կողմից նախապես ներկայացված, սակայն դեռևս չբավարարված հայտերը կամ մասնակիորեն բավարարված հայտերի չբավարարված մասը, ինչպես նաև փոփոխել դրանցում նշված պայմանները (բացառությամբ ֆինանսական գործիքի հապավման և հայտի տեսակի):

Գլուխ 8. Հասցեական առևտուր

- 104) Օպերատորի գործադիր մարմնի ղեկավարի որոշմամբ սահմանված ֆինանսական գործիքներով Օպերատորը կազմակերպում է նաև հասցեական առևտուր, որի մասին առևտրային համակարգի միջոցով տեղեկացվում է առևտրի մասնակիցներին:
- 105) Հասցեական առևտուրն իրականացվում է ֆինանսական գործիքի գնման կամ վաճառքի հասցեական առաջարկի ակցեպտավորման եղանակով, երբ առևտրի որևէ մասնակից առևտրային համակարգի միջոցով ֆինանսական գործիքով առուվաճառքի գործարք կնքելուն ուղղված հասցեական առաջարկ (օֆերտա) է ուղարկում Շուկայի որևէ մասնակցի և վերջինիս առևտրի մասնակիցն առևտրային համակարգի միջոցով այն ակցեպտավորում է:
- 106) Հասցեական առևտրի ժամանակ Շուկայի մասնակցին ուղարկվող՝ առուվաճառքի գործարքի կնքման հասցեական առաջարկում նշվում են հետևյալ պայմանները՝
 - ա) ֆինանսական գործիքի բորսայական հապավումը.
 - բ) Շուկայի այն մասնակցի առևտրային կոդը, որին ուղարկվում է հասցեական առաջարկը.
 - գ) հասցեական առաջարկի տեսակը՝ գնման կամ վաճառքի.
 - դ) մեկ լոտի գինը՝ համապատասխան արժույթով (արտարժույթով արտահայտված արժեթղթերի դեպքում՝ տվյալ արտարժույթով).
 - ե) լոտերի քանակը:

Գլուխ 9. Ռեպո գործարքներ

- 107) Օպերատորի առևտրային համակարգում ռեպո գործարքներ կարող են կնքվել միայն լրիվ նախնական դեպոնացմամբ առևտրի պայմաններում և այն ֆինանսական գործիքներով, որոնցով նման գործարքների կնքումը թույլատրվել է Օպերատորի գործադիր մարմնի ղեկավարի որոշմամբ, որի մասին առևտրային համակարգի միջոցով տեղեկացվում է առևտրի մասնակիցներին:
- 108) Ռեպո գործարք կնքելու մտադրություն ունեցող առևտրի մասնակիցը կարող է ներկայացնել ռեպո հրապարակային գնանշում և/կամ հասցեական առաջարկ, ընդ որում՝ հրապարակային գնանշում ներկայացնելու դեպքում միջոցների առկայությունն առևտրային համակարգի կողմից չի ստուգվում, իսկ հասցեական առաջարկ ներկայացնելու կամ դրա հաստատման դեպքում՝ ստուգվում է:
- 109) Ռեպո հրապարակային գնանշումներն անանուն չեն, այսինքն՝ առևտրի մասնակիցները կարող են տեսնել գնանշումը ներկայացրած շուկայի մասնակցի առևտրային կոդը: Հասցեական առաջարկի ներկայացման ժամանակ այն տեսանելի է միայն տվյալ առաջարկը ստացած շուկայի մասնակցի համապատասխան առևտրի մասնակիցներին:
- 110) Ռեպո հրապարակային գնանշման մեջ նշվում են հետևյալ պայմանները՝
- ա) ֆինանսական գործիքի բորսայական հապավումը.
 - բ) գնանշման տեսակը՝ դրամական փոխառության տրամադրում, դրամական փոխառության ստացում, ֆինանսական գործիքով փոխառության տրամադրում, ֆինանսական գործիքով փոխառության ստացում.
 - գ) մեկ լոտի գինը, ընդ որում՝ արտարժույթով արտահայտված արժեթղթերի դեպքում գինը նշվում է համապատասխան արտարժույթով.
 - դ) լոտերի քանակը.
 - ե) գնանշման ժամկետայնությունը՝ պահել օրվա ընթացքում կամ պահել մինչև չեղարկումը,
 - զ) ռեպո տոկոսադրույքը (տարեկան).
 - է) տվյալ ֆինանսական գործիքի ընթացիկ գնից զեղչը.
 - ը) ռեպո-ուղղակի և ռեպո-հետադարձ գործարքների միջև ընկած ժամանակահատվածում օրացուցային օրերի քանակը՝ 0-ից մինչև 366-ը:
- 111) Ռեպո գործարքների կնքումն իրականացվում է ռեպո-ուղղակի և ռեպո-հետադարձ գործարքների կնքման հասցեական առաջարկի ակցեպտավորման եղանակով՝ սույն գլխով սահմանված կարգով: Ռեպո հասցեական առաջարկը կարող է հիմնված լինել կամ չլինել ռեպո հրապարակային գնանշման վրա:
- 112) Ռեպո գործարքի կնքման նպատակով Շուկայի մասնակցին ուղարկվող հասցեական առաջարկում նշվում են հետևյալ պայմանները՝
- ա) ֆինանսական գործիքի բորսայական հապավումը.
 - բ) Շուկայի այն մասնակցի առևտրային կոդը, որին ուղարկվում է հասցեական առաջարկը.
 - գ) հասցեական առաջարկի տեսակը՝ դրամական փոխառության տրամադրում, դրամական փոխառության ստացում, ֆինանսական գործիքով փոխառության տրամադրում, ֆինանսական գործիքով փոխառության ստացում.
 - դ) մեկ լոտի գինը, ընդ որում՝ արտարժույթով արտահայտված արժեթղթերի դեպքում գինը նշվում է համապատասխան արտարժույթով.
 - ե) լոտերի քանակը.
 - զ) ռեպո տոկոսադրույքը (տարեկան).

- է) ռեպո-ուղղակի և ռեպո-հետադարձ գործարքների միջև ընկած ժամանակահատվածում օրացուցային օրերի քանակը՝ 0-ից մինչև 366-ը:
- 113) Ռեպո-հետադարձ գործարքի ժամկետը չի կարող ուշ լինել տվյալ ֆինանսական գործիքի մարման օրվան նախորդող օրվանից (որոշակի ժամկետով թողարկված ֆինանսական գործիքների դեպքում):
- 114) Առևտրային նստաշրջանի ընթացքում առևտրի մասնակիցներն իրավունք ունեն հանել իրենց կողմից նախապես առևտրային համակարգ մուտքագրված ռեպո հրապարակային գնանշումները և/կամ հասցեական առաջարկները, ինչպես նաև փոփոխել դրանցում նշված պայմանները: Ռեպո հասցեական առաջարկները կարող են հանվել կամ փոփոխվել, եթե դրանք մինչ այդ չեն հաստատվել (ակցեպտավորվել) Շուկայի այն մասնակցի կողմից, ում ուղարկվել է տվյալ հասցեական առաջարկը:
- 115) Ռեպո գործարքը կնքվում է, երբ առևտրի որևէ մասնակցի կողմից առևտրային համակարգի միջոցով ռեպո-ուղղակի և ռեպո-հետադարձ գործարքների կնքմանն ուղղված հասցեական առաջարկը (օֆերտան) առևտրային համակարգի միջոցով ակցեպտավորում է Շուկայի այն մասնակցի առևտրի մասնակցի կողմից, ում ուղարկված էր հասցեական առաջարկը:
- 116) Ռեպո գործարքը համարվում է կնքված առևտրային համակարգում դրա կնքմանն ուղղված հասցեական առաջարկի ակցեպտավորման փաստի գրանցման պահից:
- 117) Տվյալ առևտրային նստաշրջանի ընթացքում չակցեպտավորված հասցեական առաջարկներն ու «պահել օրվա ընթացքում» պայմանն ունեցող ռեպո հրապարակային գնանշումներն առևտրային նստաշրջանի ավարտից հետո հեռացվում են առևտրային համակարգից և հաջորդ առևտրային նստաշրջանում չեն ընդգրկվում առևտրային համակարգում:
- 118) Ռեպո-ուղղակի գործարքի կնքման պահին առևտրային համակարգը ձևավորում է ռեպո-հետադարձ գործարքի հաշվետվությունը, որն անմիջապես տեսանելի է դառնում տվյալ ռեպո գործարքի կողմերին, սակայն հաստատման համար ակտիվանում է ռեպո-հետադարձ գործարքի կնքման առևտրային օրվա համապատասխան առևտրային նստաշրջանի բացման պահից:
- 119) Ռեպո գործարքի կնքման պահից մինչև դրանով սահմանված՝ ռեպո-հետադարձ գործարքի կնքման օրվա առևտրային նստաշրջանի ավարտը ռեպո գործարքի կողմերը կարող են փոխադարձ համաձայնությամբ փոփոխել ռեպո-հետադարձ գործարքի կնքման օրը և գործարքի գումարը:
- 120) Ռեպո-հետադարձ գործարքի կնքման օրվա և/կամ գործարքի գումարի փոփոխություն կարող է նախաձեռնել միայն ռեպո գործարքով դրամական միջոցների կամ ֆինանսական գործիքի փոխատուն՝ առևտրային համակարգի միջոցով համապատասխան հասցեական առաջարկ ուղարկելով փոխառուին: Հասցեական առաջարկը փոխառուի կողմից ընդունման (ակցեպտավորման) պահից ռեպո-հետադարձ գործարքի համապատասխան պայմանը համարվում է փոփոխված:
- 121) Մինչև ռեպո-հետադարձ գործարքի կնքման ժամկետի լրանալը ռեպո գործարքի լուծումն իրականացվում է ՀՀ օրենսդրությամբ սահմանված պահանջներին համապատասխան: Առևտրի մասնակիցները ռեպո գործարքի լուծման համաձայնագիրը կնքում են գրավոր և այդ մասին պարտավոր են տեղեկացնել Օպերատորին համաձայնագրի կնքման օրվա ընթացքում՝ կցելով համաձայնագրի պատճենը:
- 122) Եթե ռեպո գործարքի լուծման համաձայնագիրը նախատեսում է ռեպո-ուղղակի գործարքով ստացված միջոցների վերադարձման պարտավորություն, ապա այն իրականացվում է կողմերի միջև համաձայնեցված կարգով:

- 123) Ռեպո-հետադարձ գործարքի կնքման համար ռեպո գործարքով դրամական միջոցների կամ ֆինանսական գործիքի փոխառուն ռեպո-հետադարձ գործարքի կնքման համար ռեպո գործարքով նախատեսված առևտրային օրվա համապատասխան առևտրային նստաշրջանի փակման պահից առնվազն 15 րոպե շուտ պարտավոր է իր կողմից առաջինը հաստատել առևտրային համակարգում ռեպո-ուղղակի գործարքի կնքման պահին ձևակերպված՝ ռեպո-հետադարձ գործարքի կնքման հասցեական առաջարկը:
- 124) Ռեպո գործարքով դրամական միջոցների կամ ֆինանսական գործիքի փոխառուն պարտավոր է մինչև առևտրային նստաշրջանի ավարտը ակցեպտավորել դրամական միջոցների կամ ֆինանսական գործիքի փոխառուի կողմից հաստատված հասցեական առաջարկը:
- 125) Ռեպո-հետադարձ գործարքը ժամկետին չկնքելու դեպքում, առանց փոփոխելու ռեպո-հետադարձ գործարքի պայմանները ռեպո-հետադարձ գործարքը կարող է կնքվել ռեպո գործարքով նախատեսված ռեպո-հետադարձ գործարքի կնքման օրվան հաջորդող 2 աշխատանքային օրվա ընթացքում:

Գլուխ 10. Սվոպ գործարքներ

- 126) Օպերատորի առևտրային համակարգում սվոպ գործարքներ կարող են կնքվել առևտրին թույլատրված արտարժույթներով՝ ռեպո գործարքների անալոգիայով՝ սույն կանոնների 9-րդ գլխին համապատասխան:
- 127) Սվոպ գործարքների կնքման հասցեական առաջարկում նշվող լոտերի քանակը պետք է բազմապատիկ լինի հազարին:

Գլուխ 11. Գործարքների գրանցման վկայականները

- 128) Առևտրային նստաշրջանի ավարտից հետո Օպերատորը ձևակերպում է կնքված գործարքների գրանցման վկայականները:
- 129) Շուկայի յուրաքանչյուր մասնակցի կողմից կնքված գործարքների համար ձևակերպվում է գրանցման վկայական, որը միաժամանակ Օպերատորի հաշվետվությունն է Շուկայի մասնակցին՝ վերջինիս կողմից կնքված գործարքների վերաբերյալ:
- 130) Գործարքների գրանցման վկայականի էլեկտրոնային օրինակն ուղարկվում է Շուկայի համապատասխան մասնակցի՝ ՍԻԲԻԷՆԵԹ համակարգչային ցանցի էլեկտրոնային փոխանցման հանձնարարականների սերվերում գրանցված իրավասու էլեկտրոնային հասցեին մինչև տվյալ առևտրային օրվա ժամը 15:30-ը: Գործարքների գրանցման յուրաքանչյուր վկայականի էլեկտրոնային օրինակի հաղորդագրությունը պետք է պարտադիր օժտված լինի հաղորդագրության առաքումը և ստացումը հաստատող անդորրագրերը ստանալու հնարավորությամբ, պաշտպանված լինի էլեկտրոնային ստորագրությամբ և ծածկագրումով:
- 131) Այն դեպքում, երբ Շուկայի մասնակիցը միացված չէ ՍԻԲԻԷՆԵԹ համակարգչային ցանցին կամ ՍԻԲԻԷՆԵԹ համակարգչային ցանցով հաղորդագրության ուղարկումն անհնար է, գործարքի գրանցման վկայականը մինչև տվյալ առևտրային օրվա ժամը 15:30-ը պատրաստվում է թղթային կրիչով՝ երկու օրինակից, որի մեկ օրինակը Օպերատորի տարածքում ստորագրությամբ տրվում է գործարքի համապատասխան կողմի ներկայացուցչին, իսկ երկրորդ օրինակը մնում է Օպերատորի մոտ:
- 132) Գործարքների գրանցման վկայականում առնվազն պետք է նշվեն Շուկայի մասնակցի անվանումը, նրա կազմում կամ անունից հանդես եկող առևտրի մասնակիցների կողմից

կնքված գործարքների տվյալները, Օպերատորին վճարման ենթակա միջնորդավճարի գումարը:

- 133) Ժամկետային վարկային ռեսուրսների Շուկայի մասնակիցներին Օպերատորը մինչև ժամը 16:30-ը տրամադրում է նաև օրական հաշվետվություն, որում նշվում է Շուկայի տվյալ մասնակցի կողմից տրամադրված/ստացված և դեռևս չմարված ժամկետային վարկերի ծավալները և դրանց տոկոսագումարները՝ ըստ ամսաթվերի, տվյալ օրը մարվող վարկերն ու դրանց տոկոսագումարները, ինչպես նաև տվյալ օրվա վերջի դրությամբ Շուկայի մասնակցի ազատ՝ չօգտագործված սահմանաչափը:
- 134) Գործարքների գրանցման վկայականի և ժամկետային վարկային ռեսուրսների Շուկայի մասնակցին տրամադրվող հաշվետվության ձևը սահմանում է Օպերատորի գործադիր մարմնի ղեկավարը:

Գլուխ 12. Առևտրի ընթացքին միջամտելը

- 135) Առևտրի ընթացքին միջամտելու (տվյալ նախաառևտրային և/կամ առևտրային նստաշրջանի բացման ժամի հետաձգում, նախաառևտրային կամ առևտրային նստաշրջանի ժամանակավոր, այդ թվում նաև՝ տեխնիկական, ընդմիջման հայտարարում, ընդմիջված նախաառևտրային կամ առևտրային նստաշրջանի վերսկսում, առևտրի դադարեցում) իրավունք ունեն Օպերատորի գործադիր մարմնի ղեկավարը, առևտրի կազմակերպումն ապահովող Օպերատորի կառուցվածքային ստորաբաժանման ղեկավարը և ՀՀ կենտրոնական բանկի լիազորված ներկայացուցիչը՝ սույն գլխով սահմանված դեպքերում, որի մասին Օպերատորը առևտրային համակարգի, ՍԻԲԻԷՆԵԹ համակարգչային ցանցի կամ հեռախոսի միջոցով 15 րոպեի ընթացքում տեղեկացնում է Շուկայի մասնակիցներին և ՀՀ կենտրոնական բանկին: Սույն կետի դրույթները տարածվում են նաև Օպերատորի կողմից կազմակերպվող՝ տեղաբաշխման և հետզնման աճուրդների վրա:
- 136) ՀՀ կենտրոնական բանկի լիազորված ներկայացուցիչը կարող է միջամտել առևտրի ընթացքին միայն Օպերատորի գործադիր մարմնի ղեկավարի կամ առևտրի կազմակերպումն ապահովող Օպերատորի կառուցվածքային ստորաբաժանման ղեկավարի միջոցով:
- 137) Նախաառևտրային և/կամ առևտրային նստաշրջանի՝ սույն կանոններով սահմանված բացման ժամը կարող է հետաձգվել Օպերատորի կանոններով նախատեսված դեպքերում կամ առևտրային համակարգի կամ դրան միանալու համար նախատեսված կապի միջոցների հետ կապված տեխնիկական խնդիրների առաջացման դեպքում, բայց ոչ ավել, քան 2 (երկու) ժամով, որից հետո հետաձգման պատճառները վերացված չլինելու դեպքում առևտրային նստաշրջանը Օպերատորի գործադիր մարմնի ղեկավարի կամ առևտրի կազմակերպումն ապահովող Օպերատորի կառուցվածքային ստորաբաժանման ղեկավարի որոշմամբ հայտարարվում է չկայացած:
- 138) Առևտրային նստաշրջանը կարող է ընդմիջվել կամ դադարեցվել, եթե առկա է՝
- ա) ֆինանսական որևէ գործիքի սովորական գների համատարած, կտրուկ կամ նշանակալից տատանումներ, կամ
 - բ) համակարգի ամբողջականության անվտանգ և արդյունավետ գործունեության խափանում կամ այդպիսի սպառնալիք, կամ
 - գ) շուկայի բնականոն գործունեությունը վտանգող այլ ազդակներ:
- 139) Առևտրային նստաշրջանի ընթացքում կարող են հայտարարվել նաև տեխնիկական ընդմիջումներ՝ առևտրային համակարգի կամ դրան միանալու համար նախատեսված կապի միջոցների հետ կապված տեխնիկական խնդիրների առաջացման դեպքում՝ մինչև

համապատասխան խնդրի վերացումը: Տեխնիկական ընդմիջումն առանց ընդհատումների կարող է տևել 2 (երկու) ժամից ոչ ավել:

- 140) Առևտրային նստաշրջանը կարող է դադարեցվել Օպերատորի գործադիր մարմնի ղեկավարի կամ առևտրի կազմակերպումն ապահովող Օպերատորի կառուցվածքային ստորաբաժանման ղեկավարի որոշմամբ, եթե սույն կանոնների 139) կետին համապատասխան հայտարարված տեխնիկական ընդմիջման ընթացքում չեն վերացվել տվյալ նստաշրջանի ընդմիջման համար հիմք հանդիսացած պատճառները:
- 141) Ընդմիջված առևտրային նստաշրջանը կարող է վերսկսվել առևտրի ընդմիջման համար հիմք հանդիսացած պատճառների վերացումից հետո՝ Օպերատորի գործադիր մարմնի ղեկավարի կամ առևտրի կազմակերպումն ապահովող Օպերատորի կառուցվածքային ստորաբաժանման ղեկավարի կարգադրությամբ:
- 142) Առևտրի մասնակիցների կողմից մինչև առևտրային նստաշրջանի ընդմիջվելը առևտրային համակարգ մուտքագրված հայտերն ու հասցեական առաջարկները պահպանվում են առևտրային համակարգում նաև ընդմիջված առևտրային նստաշրջանի ընթացքում, բացառությամբ այն դեպքի, երբ առևտրի մասնակիցը հեռախոսով և ֆաքսով, ՍիԲիԷյՆեթ համակարգչային ցանցով կամ թղթային եղանակով դիմում է Օպերատորին՝ իր կողմից առևտրային համակարգ մուտքագրված, սակայն դեռևս չբավարարված բոլոր հայտերն առևտրային համակարգից հեռացնելու հանձնարարականով, որի դեպքում Շուկայի տվյալ մասնակցի բոլոր չբավարարված հայտերն առևտրային համակարգից հեռացվում են: Սույն կետում նշված հանձնարարականը ֆաքսով կամ ՍիԲիԷյՆեթ համակարգչային ցանցով Օպերատորն ընդունում է միայն Շուկայի տվյալ մասնակցի կողմից Օպերատորին տրամադված իրավասու համարից կամ էլեկտրոնային հասցեից, իսկ ստացված հանձնարարականի հիման վրա կատարված գործողությունների վերաբերյալ կազմվում է արձանագրություն Օպերատորի գործադիր մարմնի ղեկավարի որոշմամբ սահմանված կարգով: Ընդ որում՝ ստացված հանձնարարականները և արձանագրությունները Օպերատորը պարտավոր է պահպանել առնվազն երեք տարվա ընթացքում:

Գլուխ 13. Առևտրային համակարգից դուրս կնքված գործարքներ

- 143) Օպերատորի դիտորդ խորհրդի կողմից սահմանված դեպքերում և կարգով Շուկայի մասնակիցները պարտավոր են Օպերատորին տեղեկացնել Շուկայում առևտրին թույլատրված արժեթղթերով իրենց կողմից Օպերատորի առևտրային համակարգից դուրս կնքված գործարքների վերաբերյալ:

Գլուխ 14. Օպերատորի ներքին հաշվառման գրանցամատյանները

- 144) Առևտրի մասնակիցների, նրանց կողմից ներկայացված հայտերի, հասցեական առաջարկների և կնքված գործարքների հաշվառման նպատակով Օպերատորը վարում է սույն գլխով սահմանված՝ ներքին հաշվառման էլեկտրոնային գրանցամատյանները:
- 145) Առևտրի մասնակիցների գրանցամատյանում ներառվում են հետևյալ տեղեկությունները՝
- ա) Շուկայի մասնակցի անվանումը, հասցեն, կապի միջոցները,
 - բ) Օպերատորի և Շուկայի մասնակցի միջև կնքված համապատասխան պայմանագրի համարը և կնքման ամսաթիվը,
 - գ) Շուկայի մասնակցի՝ Օպերատորի կողմից կազմակերպվող առևտրին մասնակցությունը թույլատրող լիցենզիաների համարները և տրման ամսաթիվերը,
 - դ) առևտրի մասնակցի անունը, ազգանունը, ինչպես նաև որակավորման վկայականի սերիան, համարը և տրման ամսաթիվը (առկայության դեպքում),

- ե) առևտրի մասնակցի անձը հաստատող փաստաթղթի տեսակը, սերիան, համարը և տրման ամսաթիվը,
 - զ) Շուկայի մասնակցի կողմից առևտրի մասնակցին տրված՝ տվյալ շուկայում առևտրին մասնակցելու իրավունք տվող փաստաթղթի անվանումը, տրման և գործողության ժամկետը,
 - է) Օպերատորի կողմից Շուկայի մասնակցին տրված առևտրային կոդը,
 - ը) Օպերատորի կողմից առևտրի մասնակցին տրված ծածկագիրը:
- 146) Հայտերի գրանցամատյանում նախաառևտրային նստաշրջանի և երկկողմանի անընդհատ աճուրդի ընթացքում առևտրի մասնակիցների կողմից ներկայացված յուրաքանչյուր հայտի համար ներառվում են հետևյալ տեղեկությունները՝
- ա) Օպերատորի կողմից հայտին տրված տարբերակիչ համարը,
 - բ) հայտում նշված ֆինանսական գործիքի հապավումը,
 - գ) առևտրային համակարգում հայտի գրանցման ժամանակը,
 - դ) հայտի տեսակը և հայտի բավարարման այլ էական պայմանները:
- 147) Ռեպո և սվոպ հրապարակային գնանշումների գրանցամատյանում առևտրի մասնակիցների կողմից ներկայացված յուրաքանչյուր հրապարակային գնանշման համար ներառվում են հետևյալ տեղեկությունները՝
- ա) Օպերատորի կողմից գնանշմանը տրված տարբերակիչ համարը,
 - բ) հայտում նշված ֆինանսական գործիքի հապավումը,
 - գ) առևտրային համակարգում հայտի գրանցման ժամանակը,
 - դ) հայտի տեսակը և այլ էական պայմանները:
- 148) Առուվաճառքի, ռեպո և սվոպ գործարքների կնքման նպատակով ներկայացված հասցեական առաջարկների գրանցամատյանում առևտրի մասնակցի կողմից ներկայացված յուրաքանչյուր հասցեական առաջարկի համար ներառվում են հետևյալ տեղեկությունները՝
- ա) հասցեական առաջարկով նախատեսվող գործարքին Օպերատորի կողմից տրված տարբերակիչ համարը,
 - բ) հասցեական առաջարկում նշված ֆինանսական գործիքի հապավումը,
 - գ) հասցեական առաջարկ ներկայացրած Շուկայի մասնակցին Օպերատորի կողմից տրված առևտրային կոդը,
 - դ) Շուկայի մասնակիցը ում հաշվին է կնքում գործարքը,
 - ե) հասցեական առաջարկով նախատեսված գործարքի տեսակը,
 - զ) հասցեական առաջարկում ներառված՝ առուվաճառքի կամ ռեպո/սվոպ-ուղղակի գործարքի գումարը,
 - է) հասցեական առաջարկում ներառված՝ ռեպո/սվոպ-հետադարձ գործարքի գումարը,
 - ը) ռեպո/սվոպ տարեկան տոկոսադրույքը,
 - թ) հաճախորդի ծածկագիրը (եթե հասցեական առաջարկը ներկայացվել է շուկայի մասնակցի հաճախորդի հաշվին),
 - ժ) գործողության տեսակը («ներկայացում», «փոփոխում», «փոփոխության հաստատում», «հեռացում», «գործարքի կնքում», «երկարաձգման փոփոխության հաստատում» (այն դեպքում, երբ տեղի է ունենում ժամկետի երկարաձգման հաստատում՝ անկախ այլ փոփոխությունների տեղի ունենալու հանգամանքից), «կրճատման փոփոխության հաստատում» (այն դեպքում, երբ տեղի է ունենում կրճատման հաստատում՝ անկախ այլ փոփոխությունների տեղի ունենալու հանգամանքից) կամ «մարում»),
 - ժա) առևտրային համակարգում հասցեական առաջարկի ներկայացման ժամը (ժամ:րոպե:վայրկյան),
 - ժբ) ռեպո/սվոպ գործարքի ժամկետը (օրերի քանակը),

ժգ) շուկայի այն մասնակցի առևտրային կողը, որին ուղարկվում է հասցեական առաջարկը:

- 149) Երկկողմանի անընդհատ աճուրդի և բացման աճուրդի ընթացքում կնքված գործարքների գրանցամատյանում յուրաքանչյուր գործարքի համար ներառվում են հետևյալ տեղեկությունները՝
- ա) Օպերատորի կողմից գործարքին տրված տարբերակիչ համարը,
 - բ) գործարքի կնքման ժամանակը,
 - գ) գործարքի կողմեր հանդիսացող՝ Շուկայի մասնակիցների անունից հանդես եկող առևտրի մասնակիցների կողմից ներկայացված համապատասխան հայտերի տարբերակիչ համարները,
 - դ) գործարքի կողմեր հանդիսացող՝ Շուկայի մասնակիցների առևտրային կոդերը,
 - ե) գործարքի առարկա ֆինանսական գործիքի հապավումը,
 - զ) գործարքի գինը (վարկային գործարքների դեպքում՝ տոկոսադրույքը),
 - է) գործարքի առարկա ֆինանսական գործիքի լոտերի քանակը,
 - ը) գործարքի գումարը (բացառությամբ վարկային գործարքների):
- 150) Հասցեական առևտրի ընթացքում կնքված գործարքների գրանցամատյանում յուրաքանչյուր գործարքի համար ներառվում են հետևյալ տեղեկությունները՝
- ա) Օպերատորի կողմից գործարքին տրված տարբերակիչ համարը,
 - բ) գործարքի կնքման ժամանակը,
 - գ) գործարքի կողմեր հանդիսացող՝ Շուկայի մասնակիցների առևտրային կոդերը,
 - դ) գործարքի առարկա ֆինանսական գործիքի հապավումը,
 - ե) գործարքի գինը,
 - զ) գործարքի առարկա ֆինանսական գործիքի լոտերի քանակը,
 - է) գործարքի գումարը:
- 151) Ռեպո/սվոպ գործարքների գրանցամատյանում յուրաքանչյուր գործարքի համար ներառվում են հետևյալ տեղեկությունները՝
- ա) Օպերատորի կողմից գործարքին տրված տարբերակիչ համարը,
 - բ) գործարքի կնքման ժամանակը,
 - գ) գործարքի կողմեր հանդիսացող՝ Շուկայի մասնակիցների առևտրային կոդերը,
 - դ) գործարքի առարկա ֆինանսական գործիքի հապավումը,
 - ե) գործարքի տեսակը՝ գործարքը նախաձեռնողի տեսանկյունից,
 - զ) ռեպո/սվոպ-ուղղակի գործարքի գումարը,
 - է) ռեպո/սվոպ-հետադարձ գործարքի գումարը,
 - ը) ռեպո/սվոպ տարեկան տոկոսադրույքը,
 - թ) գործարքի առարկա ֆինանսական գործիքի լոտերի քանակը,
 - ժ) ռեպո/սվոպ-ուղղակի և ռեպո/սվոպ-հետադարձ գործարքների միջև ընկած ժամանակահատվածում օրերի քանակը:
- 152) Սույն գլխում նշված գրանցամատյանների ձևերը սահմանում է Օպերատորի գործադիր մարմնի ղեկավարը: Գրանցամատյաններում գրառումները կատարվում և արխիվացվում են մինչև տվյալ աշխատանքային օրվա ժամը 18:00-ը և ենթական են պահպանման առնվազն 7 տարվա ընթացքում:

Գլուխ 15. Առևտրային համակարգի անվտանգության ապահովումը, պահուստային կրկնօրինակները և արարողակարգերը

- 153) Առևտրային համակարգի անվտանգության կազմակերպումն ուղղված է ապահովելու առևտրային համակարգում պահվող և շրջաբերվող տեղեկատվության գաղտնիությունը,

առևտրային համակարգի միջոցով իրականացվող գործառնությունների անընդհատությունը, առևտրային համակարգի աշխատանքի հուսալիությունը, ինչպես նաև բացառելու տեղեկատվության չարտոնված օգտագործումը, փոփոխումը, ոչնչացումը, առևտրային համակարգ չարտոնված ներթափանցելու փորձերի իրագործումը, իրավասությունների անթույլատրելի վերաբաշխումը, տեղեկատվության կորուստը կամ թերի առաքումը:

- 154) Առևտրային համակարգում պաշտպանության են ենթակա առևտրային համակարգով շրջաբերվող բոլոր մուտքային տվյալները և ելքային տեղեկատվության աղբյուրները, ինչպես նաև համակարգչային ծրագրերը, տվյալների բազաները, գաղտնագրման բանալիները, արխիվային ֆայլերը:
- 155) Յուրաքանչյուր առևտրային օրվա վերջին առևտրային նստաշրջանների ավարտից հետո պարտադիր կարգով պատրաստվում և չհրկիզվող պահպաններում պահպանվում են սույն կանոնների 154) կետում նշված՝ պաշտպանության ենթակա տվյալները, բազաները, համակարգչային ծրագրերը, գաղտնագրման բանալիները, արխիվային ֆայլերը:
- 156) Շուկայի մասնակցի մոտ տեղակայված՝ առևտրային համակարգի հեռացված տերմինալի միջոցով առևտրային համակարգ հայտեր մուտքագրելու կամ առևտրին մասնակցելու նպատակով իրականացվող այլ գործողություններ կատարելու անհնարինության դեպքում առևտրի մասնակիցը կարող է դիմել Օպերատորին նման իրավիճակների համար Օպերատորի տարածքում հատկացված սենյակում տեղադրված տերմինալից օգտվելու համար, որի միջոցով առևտրի մասնակիցն իրական ժամանակի ռեժիմում կարող է միանալ առևտրային համակարգին և մասնակցել առևտրին կամ, հեռախոսով, ՍԻԲԻԷՆԵթ համակարգչային ցանցով կամ թղթային եղանակով դիմել Օպերատորին՝ իր կողմից առևտրային համակարգ մուտքագրված, սակայն դեռևս չբավարարված բոլոր հայտերն առևտրային համակարգից հեռացնելու խնդրանքով, որի դեպքում Շուկայի տվյալ մասնակցի բոլոր չբավարարված հայտերն առևտրային համակարգից հեռացվում են: Ստացված հանձնարարականների հիման վրա կատարված գործողությունների վերաբերյալ կազմվում է արձանագրություն Օպերատորի գործադիր մարմնի ղեկավարի որոշմամբ սահմանված կարգով: Ընդ որում՝ ստացված հանձնարարականները (հեռախոսով ստացված հանձնարարականների դեպքում՝ դրանց ձայնագրությունները) և արձանագրությունները Օպերատորը պարտավոր է պահպանել առնվազն երեք տարվա ընթացքում:

Գլուխ 16. Ծառայողական տեղեկությունների օգտագործման և շուկայի չարաշահման արգելումը

- 157) Շուկայի մասնակիցներին, առևտրի մասնակիցներին, ինչպես նաև Օպերատորի պաշտոնատար անձանց և աշխատակիցներին արգելվում է ծառայողական կամ ներքին տեղեկությունների անբարեխիղճ օգտագործմամբ Օպերատորի կողմից կազմակերպվող շուկայում գործարքներ կնքել, ինչպես նաև կատարել գնային չարաշահումներ կամ դրանց նպաստող գործողություններ:

Գլուխ 17. Առևտրի կանոնների պահպանման վերահսկումը և պատժամիջոցների կիրառումը

- 158) Առևտրի կանոնների պահանջների պահպանման վերահսկողությունն իրականացվում է Օպերատորի և ՀՀ կենտրոնական բանկի կողմից:

- 159) Առևտրի կանոններով սահմանված պահանջների խախտման համար Շուկայի մասնակիցը պատասխանատվություն է կրում Օպերատորի և Շուկայի տվյալ մասնակցի միջև կնքված պայմանագրով, Օպերատորի կանոններով և Հայաստանի Հանրապետության Կենտրոնական բանկի կողմից սահմանված կարգով:
- 160) Առևտրի կանոնների պահպանման վերահսկողության շրջանակներում Շուկայի մասնակիցների միջև կամ Օպերատորի և Շուկայի մասնակիցների միջև ծագած վեճերը լուծվում են Օպերատորի կանոններով և ՀՀ օրենսդրությամբ սահմանված կարգով:

Գլուխ 18. Կանոններում փոփոխությունները և լրացումները

- 161) Սույն կանոններում փոփոխություններն ու լրացումները դրա անբաժանելի մասն են և ուժի մեջ են մտնում օրենքով սահմանված կարգով, եթե այլ բան սահմանված չէ սույն կանոններով: